

REGIONAL NEWS BULLETIN

Date – 18/08/2024 Time - 18:30 -18:40Hrs

HEADLINES (EVENING)

- Sorkar laipui Mizorama raltlan awm mek mi 45,000 bawr velte tan buhfai cheng vaibelchhe 5 hu pekna tur ruahmanna a siam.
- Kumin chhungin African Swine Fever (ASF) vawk pulhri leng avanga Mizorama vawk thi zat chuan 10,000 a chuang ta a, vawk suat zat pawh 18,000 a chuang ta bawk.
- Hmeichhe doctor pakhat pawngsual leh thah thlenna, Kolkata-a RG Kar Medical College & Hospital chhehvelah mi 5 aia tam punkhawm khapna thupek chhuah a ni.
- Gaza-a Israel leh Hamas inkara inkahhai a awm theihna tura inbiakna, Nilaini khian Cairo-ah chhunzawm a ni dawn.

<><><>

FOOD FOR IDPS

Sorkar laipui chuan Mizorama raltlan awm mek mi 45,000 bawr velte tan buhfai cheng vaibelchhe 5 hu pekna tur ruahmanna a siam.

Ministry of Consumer Affairs, Food and Public Distribution a Under Secretary Subrata Sanyal chuan August ni 14 khan Mizoram Food, Civil Supplies and Consumer Affairs secretary hnenah lehkha rawn thawnin cheng vaibelchhe 5 hu buhfai metric tonne 1,379 leh quintal 34 chu raltlan, a bikin cyclone Remal leh khuarel chhiatna dang tawkte'n a thlawna an dawn turin a rawn pe a. Hei hi ni 60 chhunga chinfel vek tur a tih a ni a. A senso hi Ministry of Home Affairs in a rawn tum vek dawn a ni. Home department hotute chuan Food, Civil Supplies and Consumer Affairs department nen tangrualin buhfai lak leh semchhuah hna hi an thawk dawn niin an sawi a, district bawrhapse'n district chhunga raltlan awmte'n an mamawh an thehluh anga sem a ni dawn a ni.

Tun dinhmunah Mizoramah raltlan 45,000 thelh an awm mek a. Sorkar chhinchhiah dan thar berah chuan Myanmar atanga raltlante hi 33,724 an ni a, an zinga 10,800 chuhmeichhia niin 12,765 chu naupang an ni. Myanmar raltlan Mizorama awm zinga 16,979 -te chu an puala sak relief camp 129-ah awm mekin mi 16,755-te erawh chuan an chhungte leh thiante an belh bakah mahni a in luahte leh mi hnuai a thawkin ramhnuai thlamah chhungkua-in an awm chilh bawk a ni. Myanmar atanga raltlan rawn lutte hi February ni 1, 2021 a sipai-in thuneihna an hnehchhuh hnu atanga rawn lut tan, tualchhung indona avanga rawn luh belh ta zel an ni a, Mizoram district tinah an awm a ni. Champhai district-ah tam berin mi 13,966 zet an awm a, Siaha district-in dawtin mi 5,953 an awm a, Lawngtlai district-ah mi 5,922 an awm bawk a ni.

Bangladesh Chittagong Hill Tracts atanga raltlan lo lut la awm mekte hi mi 2,014 an ni a. Bangladesh atanga rawn raltlante hi district dangah awm lovin Lawngtlai district-ah chauh an awm a. Anni hi Chittagong Hill Tracts a cheng zofate

tana thuneihna sang zawk ngiata ralthuam lektu Kuki-Chin National Army (KNA) leh Bangladesh sipaite inkah fo avanga rawn raltlan an ni.

Mizoram thenawm Manipur a nikum May ni 3 atanga Meitei leh zofate inchemharna avanga Mizorama rawn raltlante hi hriat theih hnukung berah mi 8,951 an ni a, district 9-ah an awm a. An zinga mi 1,294 te hi Aizawl, Kolasib leh Saitual district a an puala siam relief camp 23-ah khawsa-in mi 7,657 te erawh chu an chhungkhat laina leh thiante an belh bakah mahni in luaha awmte an ni.

<><><>

SESSION

Naktip, August ni 20 atanga tan tur Mizoram legislative assembly fur thukhawm atan sorkar atangin dan siam tura duan 5 a lut tawh.

Assembly secretariat atanga thudawn danin Thawhlehi a tan tur ni 2 awm assembly fur thukhawm lo awm turah hian dan thar siam tur 1 leh dan dinglai simthat tura rawtna 4 nimin thleng khan a lut tawh a. House chhunga chhan tur chi (starred question) 263 leh ziaka chhan chi (unstarred question) 17 a lut tawh bawk a. Hei bakah hian Social Welfare & Tribal Affairs minister Pi Lalrinpuii hnen atangin official resolution putluh tur an dawng tawh bawk. Assembly inkhawmah hian MLA hlui, Gorkhali hnam zinga Mizoram assembly-a MLA atana ruat hmasak ber leh awm chhun Pu Kapoor Chand Thakuri sunna hun an hmang dawn a. Pu Kapoor Chand Thakuri hi kum 1972 a Mizoram UT a nih ruala assembly a neih khan Pi Saptawni leh Pu Lalhmingthanga te nen ruat seat-ah, khatih lai a Mizo Union sorkar khan a dah. Kumin July ni 15 khan Nepal khawpui Kathmandu-ah a thi a ni.

Assembly Fur thukhawm hi August ni 20 a tan turin larsap Dr. Hari Bambu Kambhampati chuan a ko a. August ni 1 khan Speaker Pu Lalbiakzama kaihhruai Business Advisory Committee (BAC) thukhawm chu inkhawm hi ni 2 ni tura relin August ni 20 leh ni 21 khian an thukhawm dawn a ni.

<><><>

ASF UPDATE

Kumin chhungin African Swine Fever (ASF) vawk pulhri leng avanga Mizorama vawk thi zat chuan 10,000 a chuang ta a, vawk suat zat pawh 18,000 a chuang ta bawk.

Animal husbandry & veterinary department hotute hnen atanga thu dawn danin vawiin khan ASF vawk pulhri vangin district 4-ah vawk 60 a thi leh a. Khawzawl district-a Chalrang khua-ah vawk 26 a thi a ni. Heti hian kumin February ni 9 a Champhai district Leithum khua a ASF vawk pulhri vei hmuhchhuah leh a nih atanga tun thlengin vawk 10,041 a thi ta a. He vawk pulhri hi tunah hian khaw 209-ah a leng mek niin department hotute chuan an sawi a ni. Vawiin vek khandistrict 5-ah vawk 58 suat a ni a. Hemi tiam hian kumin chhunga Mizoram chhunga vawk pulhri darh zel tur venna atana vawk suat zat chu 18,250 a tling tawh sa ni.

<><><>

BORDER FENCING

Sorkar laipui-in Mizoram leh Myanmar inkar ramri hung tura a tih chu Mizoram sorkar chuan a la dodal zui zel.

Sorkar laipui-in India leh Myanmar inkar ramri km. 1,643 a thui hung chungchangah Arunachal Pradesh leh Manipur sorkarte Ministry of Home Affairs-in tun hnai a na taka a nawr lai-in Mizoram sorkar erawh chu a nawr na ve vak lo ni a hriat a ni a, nawr hauh lo erawh chu a ni lo. Home department hotute hnen atanga thu dawn danin Ministry of Home Affairs hian hun hma lam deuhah khan Mizoram leh Myanmar ramri km. 404 a thui hung tur hian a rawn ti a. Sorkar hmasa leh tun sorkarin a dodalna-te chu Ministry of Home Affairs-ah thawn thlak ve ve a ni. MNF sorkar lai khan council of minister thukhawm chuan ramri hung an dodal chungchangah thutlukna an lo siam tawh a. ZPM sorkar pawhin dodal chhonzawm zelin assembly-ah ramri hung an duh loh thu hi sorkarin pulutin assembly chuan lungruual takin a lo pawm tawh a.

Hemi chungchangah hian home minister Pu K. Sapdanga chuan kumin February ni 28 khan Myanmar nena zalen taka inkalpawh tawn theihna tihtawp leh ramri hung tura thutlukna dodalna official resolution chu assembly inkhawmah a pulut a. He resolution hi lungruual taka pawm a ni. He official resolution-ah hian zalen taka inkalpawhna titawp lova ramri hung bawh loh bakah ramri tawn tawna awm Mizote inzawmkhawmna atana thawk zawk turin sorkar laipui chu an ngen nghal a ni.

Union Home Minister Amit Shah chuan kumin February ni 6 khan sorkar laipui-in Myanmar leh India hmarchhak state 4 - Arunachal Pradesh, Nagaland, Manipur leh Mizoram ramri chu hung a nih dawn thu leh zalen taka intlawhpawh theihna dan pawh hlih a nih thu a puang a. Hei hi Mizoram leh Nagaland sorkar bakah pawl hrang hrangin an dodal nghal a. Mizoramah chuan tlawmngai pawl inzawmkhawm NGO Coordination Committee chuan larsap kaltlangin Union Home Minister hnenah hian sorkar laipui thutlukna an dodal thu an thawn nghal a ni.

Economics lam mithiamte chuan ramri a zalen taka intlawhpawh theihna hlih leh ramri hung hian Mizoram leh Myanmar ramri a cheng mi tam tak ei leh bar bakah sum leh pai dinhmun a chhe zawngin a khawih nasa hle dawn niin an sawi a. A bik takin Champhai district a ramri a insumdawnna hmun Zokhawthar leh Myanmar lama chengte bakah ramri a insumdawn tawna dang 'border haat' chhawr tangkaituten eizawna kawngah harsatna an nei nghal dawn a. Mizorama chengte bawngsa ei za zela 90 chuang hi khilam atanga lakluh a nih avangin Mizoram pumin harsatna a tawh nghal bawh dawn a ni an ti. Ramri hung a nih chuan Mizoram lam ramri a chengte'n Tiau lui kama an nul-te enkawl thei lovin Tiau lui sangha hmanga eizawngte pawhin harsatna an tawh nghal dawn niin an sawi bawh.

<><><>

KOLKATA POLICE IMPOSES BNSS

Kolkata Police chuan tunhnaia hmeichhe doctor pawngsual leh thah thlenna, RG Kar Medical College & Hospital chhehvelah vawiin atangin ni 7 chhung Bharatiya Nagarik Suraksha Sanhita (BNSS) Sec 163-na a puang a, he dan hnuaiah hian mi 5 aia tam punkhawm khap a ni.

Aug ni 14 zana Medical College bungrua suasam chungchangah Students Federation of India hruaitu 2 man an ni bawk. Hetih lai hian, RG Kar Medical College & Hospital principal hlui chu CBI-in nimina thu an zawhfiah hnuah vawiinah pawh thu zawhfiah leh a ni.

<><><>

UP ROAD MISHAP

Uttar Pradesh Bulandshahr dist-a vawiina bus leh pickup insut vangin mi 10 an thi a, midang 37-in hliam an tuar bawk. Hliamte hi damdawi inah lak nghal an ni a, a na zual 4 chu Meerut Medical College-ah sawn an ni.

Bulandshahr Dist Magistrate, Chandra Prakash Singh-a'n a sawi danin, Ghaziabad atanga lo kal pickup motor leh Bulandshahr pana tlan private bus-te hi Salempur police station huamchhungah an insu a, pickup ah hian chhangthawp siamna company-a thawk, Rakshabhandhan kut hmang tura an chhungte hnena haw turte an chuang a ni.

<><><>

WEST ASIA CEASE FIRE TALKS

Gaza Strip-a Hamas leh Israel inkara inkahhai a awm theih nana inbiakna chu tunkar Nilaini khian Cairo-ah chhunzawm a ni dawn a, media-te sawi danin, he inbiaknaah hian Egypt, Qatar leh US bakah Israel palaite an tel dawn a ni.

Thudawn danin, kar kaltaa inbiakna neihna, Doha-ah Egypt, US leh Israel aiawhte an awm leh mek a, Cairo-a inbiakna neih huna sawiho turte an duang dawn a ni.

Nikum Oct ni 7-a Israel sipai-ten Gaza-a beihpui an thlak atang khan Palestine mi sing 4 chuang an thih tawh bakah hliam 92,500 chuang an awm niin Gaza Health Dept thuchhuah chuan a tarlang a ni.